

մամարդ այս քաղաքի նախկին բնակչութեան հազիւ հետքն է մնացել»:

«Հայալեզու» եւ «Հայացեղ» է համարում ուրեմն Բողենշտէդտ Երեւանի եւ Նախիջևանի երկրամասերը եւ Ախալցխայի փաշայութիւնը, որ եւ գետեզում է իր աշխատութեան «Հայ ցեղը» խորագրով հատուածի տակ:

Ընդհակառակը՝ Ղարաբաղը, Գանձակը, անգամ Ալեքսանդրապոլի գաւառը, չնայած որ այս վերջինը (Փամբակի հետ միասին) այն ժամանակները վարչականօրէն վրացա-իմերէթեան նահանգի մէջ էր մտնում, Բողենշտէդտ անում է «Թուրք-թաթարական ցեղը» խորագրով հատուածի տակ, ի շարս Ծիրովան, Շէքի, Բագու եւ թաթարական այլ շրջանների, որպէս մասեր «Թուրքօման հիմնական բնակչութեան եւ լեզու ունեցող» երկիրների:

Որչափ եւ ոչ լրիւ, բայց եւ այնպէս հայկական գաւառների մեծ մասին վերաբերեալ թուական տուեալներ գտնում ենք Բողենշտէդտի մօտ, մինչ Թուրք-թաթարական եւ վրացական շրջանների մասին նման տուեալներ պակսում են, անգամ Թիֆլիսի մասին: Բացառութիւն կազմում է վրացական Թելալ գաւառը (Կախէթիայի մի մասը), որի մասին «Կովկասի ժողովուրդները» աշխատութեան մէջ (երես 969) գտնում ենք հետեւեալ թիւերը, կցուած «Վիճակագրական նօթեր» հատուածին (տես վերը):

«Թելալի գաւառը, — ասում է Բողենշտէդտը, — ունի բնգամէնը 88,830 բնակիչ*» երկու սեռի: Դրանցից՝

Նստակեաց

Վրացի	48,500
Հայ	18,000
Թաթար	2,800

Վաչկատուն

Թուշ	7,600
Փշաւ	5,700
Սեւսուր	5,500
Քիսթ	730

Վրաց լեզուի տարածման շրջանների մասին խօսելիս Բողենշտէդտ մէկ-մէկ յիշատա-

կում եւ նկարագրում է վրացական ցեղերը (քարթլի, իմերէլ, գուրիացի, մինգրէլ եւ այլն), խօսք չանելով երկրային-վարչական բաժանումների մասին (նահանգ, գաւառ եւ այլն), մինչ նա հայ եւ թուրքօման (թուրք-թաթար) լեզուների տարածման շրջանների մասին խօսելիս առաջնորդում է այդ՝ վրացական բաժանումներով:

Այս վերջին՝ վրացական՝ տեսակէտից այն ժամանակները ողջ Անդրկովկասը ներկայացնում էր հետեւեալ զլխաւոր միաւորները. 1) Վրաց-իմերէթեան նահանգ, 2) Ախալցխայի փաշայութիւն, 3) Հայկական Շրջան, 4) Կասպեան Շրջան: Առաջին երկուսը դիտուած էին առաւելուպէս վրացական, երրորդը՝ հայկական եւ չորրորդը՝ թուրք-թաթարական հոլալիս միաւորներ:

Հայկական Շրջանից եւ Ախալցխայի փաշայութիւնից (Ախալքալաքի հետ մէկտեղ) դուրս էին գտնուած ուրեմն այստեղ մեղ մասնաւորապէս հետաքրքրող հայաբնակ շրջաններից. —

1. Ղարաբաղը (Զանգեզուրի հետ միասին), որ դնում էր այսպէս կոչուած «Կասպեան Շրջանի» սահմանների մէջ, եւ 2. Լոռի-Փամբակը, Շիրակը (Ալ-պոլ), ինչպէս նաեւ Հայկական Ղազախ — Շամշադինը (Դիլիջանի գաւառ ներկայիս) եւ Լեռնային Գանձակը, որոնք մտնում էին «Վրացա-իմերէթեան» կոչուած նահանգի սահմաններում: Լոռին, Փամբակը եւ Շիրակը միասին կազմում էին այդ նահանգի «Փամբակ-Շորաքեալ» երկրամասը, որպէս նահանգի վարչական աւելի փոքր միաւոր (դիստանցիա): Նման միաւորներ էին կազմում նոյն այդ (վրաց-իմերէթեան) նահանգի մէջ՝ նաեւ Գանձակի գաւառը (նախկին խանութիւնը), ինչպէս եւ Ղազախ-Շամշադին ու Բորչալու վիճակները (դիստանց):

Ինչ վերաբերում է վարչական այդ փոքր միաւորների վիճակագրութեան, դժբախտաբար նրանցից միայն մի քանիսի մասին Բ-ի մօտ գտնում ենք տուեալներ: Դրանցից երեւաց ուրեմն, որ «Հայկական Շրջանի» երեւանեան երկրամասը ունեցել է այն ժամանակ բնգամէնը 70-80,000 բնակիչ, որի «գրեթէ կէսը» կազմել են, ըստ Բ-ի ասութեան, թուրք-թաթարները: Եթէ մնացած կէսն էլ հայեր համարենք, ապա ուրեմն վերջիններիս թիւը

*) Համաձայն կառավարութեան կարգադրութեամբ 1842 թ. կատարուած վիճակագրութեան: Ծանօթ. Բող.ի: